

www.BibleForChildren.org

Matayo 26



Owewabbaire nga
wabulayo enaku mukaaga,
oMukolo ogw'okutambukirya
gutuuke, oYesu n'atuuka oku
kyalo ky'e Bbesaniya. OLazaalo
yabbaire mutyami w'oku kyalo okwo
era niye oyo oYesu oguyazuukizire.



Kale awo oMalyamu
n'akwata ecupa erimu
amafuta amakengeize
ag'akaloosa, era ag'ebbeeyi
eino agebeeta naludo. Awo
n'agasuka oku bigere bya Yesu, era
n'abisiimuula n'enziiri gy'okumutwegwe. Era
enyumba n'eizula akaloosa ak'amafuta ago.




Awo oYuda Isikalyoti, omoiza oku beegi eikumi na babiri, n'ayaba egiri abakabona abakulu, ng'ataka okulyamu oYesu olukwe, amuweeyo egibali. Abakabona owebawuliire ekyataka okubakolera, ni basangaala, era ni basuubiza okumuwa empiiya. Okuzwa oolwo oYuda n'anoonia akaseera akasa ak'okubabbeera bakwate oYesu.



Kale abeegi ni bakola ng'oYesu
oweyabalagiire, ni baaba ni
bategeka oMukolo
ogw'oKutambukirya. Awo oYesu
n'abeegibe owebabbaire nga balya,
oYesu n'atoola omugaati, ni yeebalya
oKibbumba, n'aguvunavunamu
n'abawa, n'abakoba ati,
"Mutoole mulye, gunu
niigwo omubiri
gwange."



Era oluzwanyuma n'akwata ekikopo
ky'enviinyo, ni yeebalya
oKibbumba n'abawa, n'abakoba ati,
"Munywe kunu nywenanywena. Ekyo
kityo olwakubba linu niiryo eisaaye
lyange eryasusuka oku lw'abangi,
era erikakasa endagaano eya
Kibbumba egyali kukola
n'abantube okubasoniya
ebikole byabwe
ebibbibibi."



Awo oYesu n'akoba oSimooni Peetero ati, "Simooni, Simooni, oSitaani asabire oKibbumba amwikirirye abagezesye okwabula abasa omu babbibabbi ng'omuntu awasenyentamu engaano. Neye nze nkusabiire, tiwawaamu okwikirirya. Era owewalimala okweningenya, ogumyanga abeege abainawo."



Neye oPeetero n'amukoba ati, "Musengwa, netegekere okwaba na iwe omu mabbuusu era n'okufeera aamo na iwe." Awo oYesu n'amwiramumu ati, "Peetero, nkukobera nti olwatyanu, onkoko yaabba akaali n'okukookoola, nga wankanegaanira emirundi misatu ng'okoba oti tommaite."




Awo oYesu n'abeegibe ni
baaba omu kifo ekibeeta
Gesusemani.

Owebatuukire eeyo
oYesu n'abakoba ati,
"Mutyame aanu, nga nze
njaba aadi negairire
oKibbumba." Era n'akoba
ati, "Iwe Bbaabba oyezya
byonabyona, ontooleku
ekipimo ekyokugada okwo.
Neye, iwe ekyotaka niikyo
ekyobba okole tinga nze
owentaka."



Kale awo oYuda n'ayaba omu musiri
ogwo nago ng'akudembereire ekibinja
ky'abaisulukale, n'abakuumi abamo
ab'eYeekaalu. Era ibo abo abeyabbaire
yeekubbembereire, abakabona
abakulu n'aBafalisaayo niibo
ababbaire babatumire. Era
ibo nago babbaire bakwaite
ebimoleka ooti mole
n'amataala era
n'ebyokulwanisya.



Era omoiza oku beegi abo n'atemaku
omugalama wa kabona akira
obukulu ekitwi eky'oku ndiiro
n'amutiicaaku. Neye oYesu
n'abakoba ati, "Mulekeraawo!"
Kaisi n'akwata oku kinkuyu
ky'ekitwi ky'omugalama oyo,
era n'akiiryawo.



Awo ni bakwata oYesu, ni bamutwala omu nyumba ya kabona akira obukulu, era oPeetero n'asenjeryaku ng'alekerekuwo eibbanga. Neye owebamalire okukuma ekisiki omu luuga akati, ni batyama aamo, era oPeetero yena n'atyama aamo nabo okwota omusyo.



Cooka omoiza oku
baweererya ba kabona
akira obukulu, era
omuganda w'oodi
oPeetero

Oguyatiiciryeku ekitwi,
n'amulumiriza ati,
"Tinakuboine naye eedi omu
musiri gw'emisaale
emizaituuni?" Awo tete era
oPeetero n'akyegaana, era n'omu
kiseera ekyo onkoko n'akookoola.
Era awo oPeetero n'awuluka, era
n'akunga ino.




Awo ab'olukiiko bonabona ababbairewo
ni basetuka, ni batwala oYesu egiri
oPiraato. OPiraato n'amubuulya ati,
"Niiwe okabaka w'aBayudaaya?"
OYesu n'amwiramumu ati, "Ee, kityo
ng'owookobere." Atyo
oPiraato n'agezyaku
okubagambirirya tete
ng'ataka okuteera oYesu.
Neye ibo ni beeyongera

okukooka bati, "Omukomerere


oku musalabba, omukomerere
oku musalabba!"



Kale awo omu kukomenkereza, oPiraato
n'abakwatisya oYesu baabe
bamukomerere oku musalabba. Awo
abaisulukale ni bakwata oYesu, ni
bamutoolawo. Era omu kwaba yabbairi
nga yeetiikire omusalabbagwe okwaba
omu kifo ekibeeta eky'eKiyanga, omu
Lwebbulaniya ekibeeta Gologosa.



Era omu kifo ekyo niiyo
egibamukomereire oku
musalabba. Era omu
kifo ekinyere ekyo
ni bakomerera
n'abandi babiri
oku misalabba
gyabwe, oku
lubba n'olubba,
oYesu nga iye
abalimu akati.




Awo esaawa gyabbaire ooti mukaaga egy'omusana,
eisana ni lirikira era endikiirya n'ekwata oku kyalo
kyonakyona paka oku saawa omwenda egy'eigolo. Era
omu kaseera ako olutimbe

olw'omu Yeekaalu ni
lunyiirikamu akati ni
bibba ebitundu bibiri.

Awo oYesu n'akunga
maaminkirira ati,
"Bbaabba, nkukwatisya
omwoyo gwange!"

Oweyamalire
okukunga atyo,
n'afa.



Wabbairewo omusaiza ogubeeta
oYusufu ow' Alimasaaya eyabbaire
omukwenda omu lukiiiko
olukulu olw' aBayudaaya,
era ogubawa ino
ekitiisya. Era yena
yabbaire akuumirira
okubbaawo
kw' obwakabaka

bwa Kibbumba.
OYusufu oyo
n' aguma, n' ayaba
egiri oPiraato
n' amusaba omulambo
gwa Yesu.



Kale oYusufu n'agula olugoye
olutukula, olusa olw'ebbeeyi
eino, n'ayanula omulambo
gwa Yesu oku musalabba,
n'agulingira omu lugoye
oolwo, n'aguteeka
omu magombe
ag'empuku, era
agebabbaire

batemere mwibbaale.
N'ayiringitya
ogubbaale, n'aigalira
omulyango
gw'amagombe.



Awo oku lunaku olwairireku, era nga
ku Saabbaato, abakabona abakulu
n'aBafalisaayo, ni baaba
egiri oPiraato, ni
bamukoba bati, . . .



... "Musengwa, twewukirya tuti omubbeyi oyo oweyabbaire ng'akaali mwomi, yakobere ati oluzwanyuma lw'okufa yalizuukira oku lunaku lwokusatu."



“Kale ni baaba, ni basiba
bakalangulira nakimo
eibbaale omu mulyango,
era ni balekawo
abakuumi.”



Awo ng'eSaabbaato ewoireku,
amakeezi pwi olwesaabbiiti,
oMalyamu oMangadaleena
n'oMalyamu ogondi ni
baaba okubona
amagombe ag'empuku
omu babbaire
bateekere oYesu.

Kale
owebatuukire ni
wagwawo omusisi
ow'amaani, . . .



... Kale owebatuukire ni wagwawo
omusisi ow'amaani, olwakubba
omalaiika wa Musengwa
oKibbumba yazwire
omwigulu n'aika oku
magombe nago
n'ayiringitya
eibbaale
eryabbaire omu
mulyango

n'alitoolawo,
era n'alityamaku.
N'olwekyo abakuumi
ni bamutya ino, ni
batukuta era ni
babba ooti
bafiire.



Awo omalaika n'akoba abakali abo ati,
"Timwatya, mmaite nti munoonia
Yesu ogubakomereire oku
musalabba. Aanu abulawo,
azuukiire
ng'oweyakobere.
Mwize mubone
egibabbair
bamuteekere."




Kale abakali abo ni bazwa mangu oku
magombe ag'empuku nga batiire, neye
nga baizwire eisangaalo, ni bairuka
okukobera abeegibe.



Awo owebabbair baaba, oYesu
n'abeerukira ng'abazwera omu maiso,
n'abakoba ati, "Mbasugiirye!" Era
bamwigereraku, ni bakoma
amazwi kaisi ni beevambirya
oku bigerebye ni bamusinza.





Oluzwanyuma, oYesu n'abonekera abeegibe eikumi na moiza, nga batyaime balya. N'abanenya olwa kutabba n'okwikirirya, n'olw'obukakanyali bw'emyoyo gyabwe olwakubba tibaikiriirye ebibono byabo abamuboine ng'amalire okuzuukira. Awo oMusengwa oYesu oweyamalire okutumula nabo, ni bamutwala omwigulu, n'atyama n'oKibbumba omu kifo ky'ekitiisya eino.



Ekyo kityo olwakubba oKibbumba
yatakire ino abantu era n'awaayo
oMwanawe omoiza yenkani, kaisi buli
muntu amwikiririryamu tiyajigirika,
wazira abbe n'obwomi
obutawaawo.



Ab'e Looma 3:23 Kiri kiti, buli muntu yabbengere omu maiso ga Kibbumba, era n'atayezya okuseseegerera oku kitiisya ekyatutakirya.

Ab'e Looma 6:23 Ikyo omuntu ekyasuna ng'empeera y'obugalamabwe eeri ekibbikibbi, kufa. Neye ekirabo iye oKibbumba ekyagaba abantu amantakikolerera, bwomi obutawaawo. Era, obwomi obwo tubusuna lwa kweyunga ku Kurisito oYesu oMusengwa waiswe.

Ab'Ebbulaniya 9:27 Era nga buli muntu oKibbumba oweyamutegekeire okufa lumo, era oluzwanyuma lw'okufa, ni bamusalira omusango,



Ab'Efeeso 2:8,9 OKibbumba yabalokoire lw'ekisaakye olwa kwikiririrya omu Kurisito oyo. Iye okubalokola tikyazwire kuniinywe, wazira kinu kirabo kya Kibbumba. Tikyazwire mu bikole byanywe ebisa, oolwo kaisi tiwaabbaawo muntu yenayena eyewaana.

Ab'e Looma 10:9,10 Tukoba tuti omuntu yenayena kasita abbutula n'omunwagwe omulwatu ati oYesu niye oMusengwa wa byonabyona, era n'aikiririrya nakimo omu mwoyogwe ati oKibbumba dala yazuukizire oYesu, oKibbumba yamulokola. Iye omuntu asooka kwikiririrya mu Yesu omu mwoyogwe kaisi oKibbumba n'amubala okubba muntu atuukiriire. Tete era, asooka kubbutula na munwagwe mulwatu ati aikiririrya omu Yesu kaisi n'alokoka.



Yokaana 3:16,17 Ekyo kityo olwakubba oKibbumba yatakire ino abantu era n'awaayo oMwanawe omoiza yenkani, kaisi buli muntu amwikiririryamu tiyajigirika, wazira abbe n'obwomi obutawaawo. Ekyo kityo olwakubba oKibbumba tiyatumire oMwanawe oku kyalo kusalira bantu musango, wazira yamutumire, kaisi abantu balokoke nga babita mu niye.

1 Yokaana 5:11-13 OKibbumba akakasa ati yatuwaire obwomi obutawaawo, era obwomi obwo tubusuna kubita mu Mwanawe. Kale iye oyo aali n'enkolagana n'oMwana wa Kibbumba, ali n'obwomi; era iye oyo abula enkolagana n'oMwana wa Kibbumba, abula obwomi. Kale mbawandiikira oku bintu binu, inywe abaikiririrya omu liina ly'oMwana wa Kibbumba kaisi mwezye okumanya muti muli n'obwomi obutawaawo.



Matayo 26-28; Luuka 22-24; Yokaana 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Gwere Bible (gwr) © Wycliffe Bible Translators, Inc. All
rights reserved.

<https://live.bible.is/bible/GWRWBT/MAT/1>

©2026 Bible for Children, Inc.

www.M1914.org

www.bibleforchildren.org

